

HEADLINES (MORNING)

1. Tun thla ni 13-a Prime Minister Narendra Modi-a rawn zin tur dawngsawng turin inpuahchahna ngawrh taka kalpui a ni .
2. Kolasib ah Mega Oil Palm Plantation Drive nimin khan neih a ni.
3. Prime Minister Narendra Modia chuan India in Semiconductor ecosystem chak tak a siam tih sawiin hun reiloteah mahni a intodelh ang a, khawvel ramdang a elpha thuai ang a ti.
4. Vawiin atangin GST Council Meeting vawi 56-na chu New Delhi ah tan a ni dawn.

<><><>

PM VISIT PREPAREDNESS

Sept ni 13-a Prime Minister Narendra Modi-a rawn zin tur dawngsawng turin inpuahchahna ngawrh taka kalpui a ni a, Aizawl Municipal Corporation (AMC)-a thawkte chuan Aizawl Mayor Pu Lalrinenga Sailo leh Municipal Commissioner Pu Joseph H. Lalramsanga hoin Chaltlang Veng leh Chanmari Veng inkar kawngpui leh a chhehvel tihfai hnatlang nimin khan an nei a. AMC hian Prime Minister rawn zin tur pual hian a hmaa an lo tihfai tawh Dawrpui leh Zarkawt veng retaining wall-te chu rawng an hnawih nghal bawk.

India in kumpuinu awpna hnuaia zelenna a hmuh kum 78na hman mekah, Mizoram chu a vawi khat nan state dang atangin relin a chhun tlang ve dawn ta a, September ni 13-ah Prime Minister Pu Narendra Modi an a rawn hawng dawn a ni. Prime Minister-in Aizawl a rawn zin huna a paltlang tur veng 14-a Local Council hruaitute chuan AMC-in a ngen angin an veng theuh tihfai hna an lo thawk tawh a; Lammual bawlhhlawh thenfai hna thawh a ni tawh bawk.

AMC hian thla hlui August ni 27 khan thu chhuah siamin, Prime Minister-in Aizawl a rawn tlawh dawn avangin Thuampui Helipad atanga Lammual inkara kawngpui (Chaltlang leh Ramhlun) leh a chhehvela bungraw dah hnawkte chu tun thla ni 5 ral hma ngeia senghawi vek turin a hriattir a. Workshop hrang hrang leh dawr siamte chu an hmunhma tifai tur leh an bungruate dawr chhunga senglut vek tur in a hriattir bakah, office-te pawh an hmunhma tifai turin a ngen bawk a ni.

Chief Secy Pu Khilli Ram Meena-a hovin Prime Minister lo dawnawn dan tura inbuatsaihna hi sorkar lam chuan a ngawrh chho hle a, venhimna tha taka kalpui dan tur te, Lengpui, Thuampui leh Lammuala hun hman dan tur te leh Mizoram kutchhuak thuam, thlai leh thei chi hrang hrang pholan dan tur te sawi a ni a. Hun pui ber hmanna Lammualah hian Aizawl District huam chhunga Sawrkar hnathawkte, Kuthnathawktute, School zirlai leh College zirlaite an tel theih nana ruahmanna siam dan tur sawi a ni bawk. Veivahna kawnga harsatna a awm loh nan lirthei hunna tur hmun ruahman dan tur te, kawng leh a chhevel tihfai leh chei dan tur te sawi ho a ni bawk.

<><><>

DAMPA BYE ELECTION

MNF Party chuan vawiin hian Dampa bial bye election neih tura an candidate tur an puang dawn a, ZPM Party chuan puang tawhin, party dang ten an candidate tur an la tifel lo a ni. Congress party chuan Dampa biala ding tur an candidate an puang thuai dawn niin an sawi a, Mizoram BJP hotute hnen atanga thu dawn danin Dampa bial bye election neih tura an party candidate tur nomination committee chu an thukhawm tawh a, an party candidate an tihfel hunah Prime Minister puantir an tum a, party dang nena thawhho tumna erawh an ngaihtuahna ah ala awm rihlo tih an sawi bawk. Hetih lai hian People's Conference Party chuan Dampa bial bye Election ah candidate neih leh neih loh chungchang an la ngaihtuah loh thu an sawi a ni. Hetihlai hian, Dampa bial By-Election lo awm tur atana Special Summary Revision of Photo Electoral Roll chu kalpui mek a ni a, nimin khan Draft Electoral Roll chu Pu K.Laltlawmlova, District Election Officer chuan a tlangzarh.

Dampa bial huam chhungah hian Polling Station 41 awmin Voters 20405 an awm a, mipa 10425 niin hmeichhia 9980 an ni. Dampa bial huam chhunga Voter tlemna ber chu Zopui Polling Station niin Voter 38 an awm a, Silsury Polling Station niin Voters 1089 an awm mek a ni. Service Voter hi 115 an awm bawk.

DEO Pu K.Laltlawmlova chuan Roll felfai leh tha chu inthlanna thianglim leh muanawm tak kalpuina tura thil tul leh pawimawh a ni a ti a, Draft Electoral Roll tlangzarh copy hi Political Party aiawhte hnenah District Election Officer hian a hlan nghal a ni.

Nimin vek khan he inthlan atana Booth Level Officer (BLO) te tan training neih a ni a. Dampa bial huam chhungah hian Polling Station 41 awmin, BLO 41 an awm a ni.

<><><>

LADC SESSION

Lai Autonomous District Council, Emergency Budget Session ah LADC Budget 2025-2026 cheng Nuai sing 2, sang 6, za 3, sawm 5, panga POINT bial pasarih chu nimin khan eptu te tel lova pass a ni.

Session tawpni nimina pass tak budget hi Chief Executive Member Pu N.Zangura'n House a a pharh tawh LADC Budget 2025-2026 leh Demand for grant 2024-2025 leh Chhiah tling khawm atanga hmuh beisei, avaiin cheng Nuai sing 2, sang 6 a ni. Chief Executive Member Pu N.Zangura chuan hun reitak LADC Sorkar buai vanga mipui leh hnathawktuten an an tawrh hnu ah Budget passed a ni ta chu lawmawm a tih thu a sawi a ni.

Nimin chawhma session ah Deputy Chairman thlan niin, Sangau South bialtu MDC, Pu JB.Vanhoy chu chuhtu awmlovin thlantlin a ni.

Lai Autonomous District Council, Emergency Budget Session hi Au

gust 29 khan tan a ni a, Eptu lam ten Session chu dan kalha koh ni a sawiin, inhnial buaina karah Chairman chuan Session a titawp lailawk a, Thawhtanni chawhma lam ah Eptu Member ten sawisel chhunzawmin inhnialna kar ah Chairman chuan Session a titawp lailawk leh a, Eptu Member ten House pawh an chhuahsan nghe nghe a, session tawpni hian chawhma leh chawhnu lam ah Eptu Member ZPM Legislature Party te Session ah hian an tello bawk a ni

<><><>

ACCESS AUDIT

Mizoram State Commissioner for Persons with Disabilities office leh Audit Team te chuan nimin khanPM Shri MICE School Tuikual, Govt Mizo High School leh Govt Mizo Higher Secondary School Chanmariah Access Audit an nei a, Mizoram District pasarih ah he programme hi kalpui tawh niin, Mizoram pumpuiah endikna hi neih chhuah vek tum a ni.

Rualbanlote chanvo humhalhna dan "**The Rights of Persons with Disabilities Act, 2016**" chuan Accessible India Campaign chu a ngai pawimawh em em a. Rualbanlo wheelchair hmangete, mitdel leh a dangte tan mipui punkhawmna vantlang building zawng zawng chu Daltu awmlo leh an thlen theih nan siam ngei tur a ni tiin thupek a siam a. He mi bawhzui nan hian Audit Team te leh rualbanlo ten heng hmun hrang hrang hi an endik thin a ni.

<><><>

MEGA OIL PALM PLANTATION DRIVE

Kolasib ah Mega Oil Palm Plantation Drive nimin khan hman a ni a. He hun hi Dy Speaker Pu Lalfamkiman a hman pui a, loneitute hnena a thlawna sem tur Oil Palm tiak thahnem tak a vailiam nghal a ni.

He huna tarlan anih danin, Kolasib leh Mamit ah Godrej Agrovat hnuaiah oil Palm chinna zau zawng chu ha1776 a ni a, loneitu 1030 in an ching a ni. Kolasib bikah ha 313 a rah hralh theihna a awm a, ha 485-ah a la sen avangin hralh theih a la ni lo a ni. Kolasiba Oil palm chin mek zau zawng hi 798 ha a ni a, a chingtu, Farmer 496 an awm a ni. Oil palm hi tun sawrkar kum kalmekah loneitute hian cheng vbc 1 leh nuai 43 vel an hralhchhuak tawh a, cheng vbc 3 man hu vel hralhchhuah leh beisei a ni.

Oil Palm Mega Plantation Drive hi District Agriculture Officer Pu Joseph Lalnunluangan a a kaihruai a, Kolasib District chhunga Oil Palm chingtute leh oil palm chin chungchanga hriat belh duh mi thahnem tak an kalkhawm a ni.

He huna tarlan anih danin, Sawrkar in Oil Palm chingtute tan hamthatna tamtak a siam a, chungte chu, a thlawna a chi tiak te loneitute hnena sem te, Oil palm rah hun, kum li hma a oil palm nena phun kawp tur thlai ngaihtuahpuite, leitha a enkawl man tur bituk chin tum pui te, tuipekna hmanrua, link road siam leh repair te leh thil pawimawh dang te ah a tul dan ang zelin sawrkar in a pui thin a ni. Heng bakah hian mamawh hrang hrang lakkhawmna tur One stop solution pawh Bukvanneiah din a ni a, hmun dangah pawh din belh zel tum a nih thu dawn a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

INTACH MIZORAM CHAPTER

North Khawlek khaw bul Thingkhuang ngaw pûka ruhro thahnem tak hmuh chhuah chu kum 700 liamta vel ami, AD 1260 -1320 inkara mite an ni tih finfiah a ni.

INTACH, Mizoram Chapter hotute chuan nimin khan Aizawl Press Club-ah thuthar thehdarhtute kawmin he thu hi an sawi a, INTACH Mizoram Chapter convener Pu Rin Sanga, IAS (Rtd) chuan, ruhro te chu North Khawlek khawtlang hruaituten zirchiang tura an ngen angin an zirchian thu a sawi a, ruhro hmuh chhuah zing atang hian uluk takin carbon-14 dating tihna tur sample lak niin, he'ng sample-te hi khawvela laboratory hmingthang Beta Analytic, Miami, Florida, USA-ah thawn a nih thu a sawi.

INTACH, Mizoram Chapter hotute tarlan danin, ruhro awmna pûkah hian kumin January ni 11 khan Khawlek khaw mi Laltlanhlua chu lutin, ruhrote hi a hmu a, May ni 2 khan INTACH Mizoram Chapter chuan Art & Culture department-a archaeologist Vanlalthuma Singson leh HATIM, Lungleia assistant professor Dr Lalhminghluate nen Thingkhuang ngaw pûk hi a hmunah an tlawh a, ruhrote hi an zirchiang a ni.

Pûk hi Vanbawng leh North Khawlek khaw inkar kham panga awm niin, lei atangin feet 50 vela sanga awm a ni a, pûk chhungah hian mihring ruhro thahnem awmin, chu'ng zingah chuan luruh keh leh a keh lo pakua leh taksa peng dang ruh bakah, bêl kehthem engemawzat a awm a ni.

<><><>

PM

Prime Minister Narendra Modia chuan India in Semiconductor ecosystem chak tak a siam tih sawiin hun reiloteah mahni a intodelh ang a, khawvel ramdang a elpha thuai ang a ti. Nimina Semicon India 2025 New Delhi-a Yashobhoomi-a a hawnnaah he thu hi sawiin Pu Modia chaun semiconductor hralhchhuahnaah dollar tluklehdingawn zaruk chuang a kai tawh tih sawiin kum lo kal turah dollar tluklehdingawn sangkhat a pel ngei dawn tih a sawi a ni Khawvelin India a ring tawh tih sawiin India-a semiconductor hmunpui siam turin a inpeih a ti a. India-a chip tereuhte hian nakin lawkah khawvelah danglamna lian tak a la thlen dawn a ni a ti a. Kum 2021 atangin semiconductor project 10 din tura pawm tawh niin a hlut zawng pawh dollar tluklehdingawn 18 hu a ni a ti a. Sawrkarin tun aia changtlung zawk hmalakna a nei thuai dawn tih a sawi bawk a ni.

<><><>

AFGHANISTAN EARTHQUAKE

Afghanistan lirnghing avanga thi zat chu mi 1400 chuang an tling tawh. Magnitude 6 a nain Pathianni kalta khan Jalalabad hmarchhak km 27 a hlaah lir a nghing a. Chenna in tam tak a chim a, chhanchhuah hna hi ngawrh taka thawh mek a ni a. India chuan chhawmdawl na bungrua thahnem tak a thawnlut nghal a ni.

<><><>

GST

Vawiin atangin GST Council Meeting vawi 56-na chu New Delhi ah tan a ni dawn. Union Finance Minister Nirmala Sitharaman chu ni hnih awh inhmukkhawm hi a ho dawn a. GST chugnchanga tihdan tha zawk leh thil thar te ngaihtuah a ni ang. Kumin Independence Day ah khan Prime Minister Narendra Modia chaun chhuan thar tana GST siamthat a pawimawh thu sawiin he insiamthatna thar hi Diwali ah puan a ni dawn a ti a. Mipui nitin mamawhah chhiah tihhniam a ni dawn tih sawiin hei hi mi naran, loneitute leh MSME te tan a hlawk dawn hle a ni a ti.

<><><>